

## VI.

(Zu Seite 233.)

## Markt- und Polizeiordnung.

*Handschrift: Reinschrift in den Akten C. XVI. 52f Bl. 211—225.*

27. Februar 1570.

Gebott und vorboth des raths zu Dreßden anno domini 1570, denn 10. Martii publicirt, denn 19<sup>ten</sup> Martii zu Aldenn Dreßdenn. (Zu auffsehern sein geordnet, das der neuen margkt- unnd kauffordnung und andern artickel gebürlich nachgesetzt werde: der nachrichter, die baide marcktmeister, Caspar Berger, Hans Meiernn, Pfundt, unnd die gerichtsdienner. Unnd domitt sie sich in furfallendenn gebrechenn, die sich auff marckt und sonstenn zutragenn, raths und bescheidts erholenn können, seindt sie an dem stadtrichter Hans Hasenn und Georg Schwartzenn rathsvorwandtenn unnd in abwesenn gedachts Schwartzens an Jobst Bodecker gewiesenn. Waß aber die ordnung ann der Elben betriefft, darauff sollenn der gleitzman und richter bemelts orths sonderliche achtung habenn, das demselben auch allenthalbenn volge geschee, unnd sich bey Paul Behrnn, Hans Walther und Hans Rugern als den schatzhern, wann ethwas ankomptt oder sonsten mangel unnd gebrechen furfallen, raths und bescheidts erholenn.)

## Die marckt- und kauffordnungk.

## Vom vorauffkeuffenn der hockler unnd anderer.

Nachdeme inn dieser stadtDreßdenn das schedliche vorauffkeuffenn sehr uberhandt genhommenn unnd theurung gebihret, wie mann dasselb teglich mitt schadenn erfaret, das dann die hockelei nicht die geringste ursach zur steigerung ist, als wirdt auff des churfurstenn zu Sachssenn ꝛ. unnd burggraffen zu Magdeburgk unnsers gnedigstenn herren bescheenen bevhelich von dem rath doselbst hiemitt geordnet, gesetztt unnd gebothenn: das nuhn hinfuro nymands der hockelei pflegenn unnd dieselb treibenn soll, er sey dann burger unnd heußlich besessenn, die andern aber, die nicht burgerrecht habenn, sollenn hiemitt gantzlich abgeschafft sein.

Unnd domitt die hockenn, sie seindt einheimisch oder frembde, fur den pauers- unnd andern leuthen, welche ettwas zu marckte herein bringenn, zu erkennenn unnd ein unterscheidt zwischenn inenn